

**MESYUARAT PERTAMA PENGGAL PERTAMA
DEWAN UNDANGAN NEGERI PULAU PINANG
YANG KEEMPAT BELAS
02 OGOS 2018**

PERKARA : 4(B)(XVII)3

**SOALAN BERTULIS OLEH AHLI KAWASAN BERTAM
YB. KHALIQ MEHTAB BIN MOHD ISHAQ**

3. Penguatkuasaan terhadap peniaga-peniaga yang berniaga di tepi jalan perlukan satu tindakan yang tegas dan juga memerlukan tindakan bersepadu daripada Pihak Kerajaan Tempatan dan juga Jawatankuasa Kemajuan dan Keselamatan Kampung (JKKK). Pada masa yang sama, apakah alternatif yang boleh kita sediakan untuk memastikan peniaga yang berniaga di tepi jalan diberikan satu kawasan yang sesuai.

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

3. Penguatkuasaan terhadap peniaga-peniaga yang berniaga di tepi jalan dikendalikan secara berhemah berdasarkan akta-akta sedia ada yang diperuntukkan di bawah Undang-Undang Kecil Pihak Berkuasa Tempatan (PBT). Penguatkuasaan yang dilaksanakan oleh Majlis Bandaraya Pulau Pinang (MBPP) dan Majlis Perbandaran Seberang Perai (MPSP) adalah bertujuan untuk menjamin keselamatan pengguna jalan raya serta bagi menangani isu kesesakan lalu-lintas yang disebabkan oleh peniaga-peniaga yang berniaga di tepi jalan.

Bagi memastikan kebajikan rakyat Pulau Pinang terpelihara, pihak PBT bersama-sama dengan pihak Jawatankuasa Kemajuan dan Keselamatan Kampung (JKKK) telah mengambil langkah

alternatif untuk memastikan peniaga yang berniaga di tepi jalan diberi peluang untuk menjalankan aktiviti perniagaan mereka secara sah. Langkah-langkah alternatif yang disediakan adalah seperti berikut:

- (i) Menyediakan tambahan petak niaga di pasar awam dan kompleks makanan PBT yang masih mempunyai ruang yang bersesuaian.
- (ii) Mengenalpasti dan mewujudkan satu kawasan yang sesuai sebagai Tapak Penjaja Sementara.
- (iii) Mensyaratkan pemaju supaya menyediakan kawasan ruang niaga yang bersesuaian dalam perancangan pembangunan.
- (iv) Melaksanakan penempatan semula penjaja di kawasan perumahan yang baru.
- (v) Memberikan keutamaan mengisi ruang niaga PBT, terutamanya di pasar dan kompleks penjaja kepada penjaja di gerai-gerai yang telah diambil tindakan penguatkuasaan. Peniaga-peniaga ini perlu menghadiri temu duga yang ditetapkan oleh pentadbiran PBT pada setiap bulan untuk memilih gerai-gerai yang masih kosong.
- (vi) Melaksanakan program tahunan penempatan penjaja bagi setiap kawasan Parlimen dan mengenal pasti satu kawasan yang sesuai bagi penjaja yang sedia ada.
- (vii) Menggalakkan perniagaan berkonsepkan "Trak Makanan" dan "Trak Perkhidmatan" mengikut Garis Panduan Kaedah Penjajaan Secara Mudah Alih yang disediakan oleh PBT.
- (viii) Menggalakkan penjaja menjalankan aktiviti perniagaan secara konsep mudah alih mengikut Garis Panduan Kaedah Penjajaan Secara Mudah Alih yang disediakan oleh PBT.

